

# INUIT ATAQATIGIIT

## Inatsisartuni



9. november 2019

Inatsisartut Suleriaasianni § 37, imm. 1 naapertorlugu apeqqutit uku Naalakkersuisunut saqqummiuppakka.

### **Naalakkersuisunut apeqqutit:**

- 1. Qallunaat oqartussaasuisa kalaallit meerartaannik arsaarinnittarnerat Naalakkersuisut qisuariaateqarnatik akueriinnalersaarpat?**
- 2. Qallunaat oqartussaasuisa kalaallit angajoqqaat akuutillugit angajoqqaat najorneqartut, angajoqqaatullu oqartussaaneermik sulianik ingerlatsinerat Naalakkersuisut iluarisimaarpaat?**
- 3. Angajoqqaap aappaa Danmarkimi najugaqartillugu aappaalu Kalaallit Nunaanni najugaqartillugu angajoqqaatut oqartussaaneq pillugu suliani periutsit ersarissarniarlugit Naalakkersuisut qallunaat oqartussaasuunik oqaloqatiginninnissamik aallartitsinissamik suliaqalersaarpat?**
- 4. Naalakkersuisut sammisaq pillugu allanik paasissutissiissutissaqarpat?**

(Inatsisartunut ilaasortaq Stine Egede, Inuit Ataqatigiit)

### **Tungavilersuut:**

Sermitsiami ulloq 16. oktober qallunaat oqartussaasuisa kalaallit meerartaannik arsaarinninnermik suliaqarnerannik oqaluttuaq alianartoq allaaserineqarpoq. Ajornartorsiut manna inuiaqatigiinni uatsinni imartuupilussuvoq, qallunaammik oqartussaasuisa meerartatsinnut sakkortuumik iliuseqartarnerat oqaluttuarisaanitsinni nallaattarsimagatsigu.

Kalaallit Nunaanni angajoqqaatut oqartussaaneermik inatsit angajoqqaatut oqartussaaneermik suliani, angajoqqaap aappaata Danmarkimi najugaqarnerani aappaatalu Kalaallit Nunaanni najugaqarnerani suliat ingerlanneqartarnerat pillugu periusissianik ersarissunik amigaateqarpoq. Taamaammat nunat tamat akornanni maleruagassat atorneqartarput. Danmarkimi Familieretshusip meeqqanut kalaallinut, Kalaallit Nunaanni najugaqartunut aalajangiisinnaanermut piginnaatitaasinnaanera naalagaaffeqatigiinni inatsisit aaqqissuunneqarnerannut naapertuussorinangilaq. Qallunaat oqartussaasuisa meeqqanut inatsisit naapertorluinnarlugit Kalaallit Nunaanni najugaqartunut, kalaallit eqqartuussiviitigoorteqqaarnagit aalajangiisinnaanerannik pisoqarnera paasiuminaatsittorujussuara.

Apeqqutima ullut qulit ingerlanneranni akineqarnissaat qinnutigaara.